


漢志水道疏證



漢志水道疏證

洪頤煊撰

叢書集成初編

(補印本)

漢志水道疏證

一九三九年十二月初版
一九六〇年五月補印

洪 頤 煊 撰

商務印書館出版

上海洪興印刷廠印刷

序

夫天下之至變者莫如水。或千百年而變。或數十年而變。或一二年而變。觀其趨決無常。遷徙不定。載籍所陳。靡得而盡也。然其中名號雖殊。源流本一。學者加以考證。則古今不變之經。改易之跡。猶可如指掌焉。自古言水道者。山海經雖荒邈難稽。而支源可尋。外此最詳者。莫如禹貢。其次則有漢書地理志。嗣後水經有作。酈氏有注。加以應劭。闕駟。杜預。郭璞之徒。參稽引證。厥名猶詳。至宋元以後。世競新名。舊蹟漸廢。而班氏之所記始微矣。以漢志上考禹貢諸水。禹貢河入海在碣石。志則改從章武。禹貢江入海在中江。志則改從北江。禹貢蟠冢導漾。東流爲漢。志則有西漢。東漢之分。禹貢導黑水至于三危。志則僅記黑水祠于滇池。而不詳其所出。蓋以志上距禹貢已歷二千餘年。其所言乖異。宜無怪其然也。水經撰于和順以後。去志未遠。淇水至黎陽入河而止。水經則自內黃以下。盡目淇流。沮水與沔水互通。水經卽以東狼谷爲沔水所出。汝水出定陵。水經謂在梁縣。沛水至乘氏爲泗水。水經則通名之曰濟。它如易湖。漢爲贛水。改鬱水爲溫水。河東則詳澮。涑。九江則出肥。施。枝分派別。不可悉舉。降而下之。則又無論矣。班氏身爲蘭臺令史。得見天下圖籍。故其所記約而能該。詳而有法。東京大儒如許君撰說文解字。鄭君注尙書周禮。所引地說多與志同。則其書之精密不苟。取重後世。有自來已。顧煊劉覽有年。因取班氏所記。可名者三百六十一。無名者一百三十一。隨其所入。條分縷繫。又復錯舉古書。證其同異。別爲四卷。首記北方

諸水。次記東南諸水。次記西南諸水。未仿水經之例。記以地澤所在。俾學者窮源竟委。觸目可知。用以推當時之古道。息衆論之紛爭。則區區之述。亦未必無補于來哲云爾。嘉慶九年十二月八日。臨海洪頤煊書于橐城官舍。

漢志水道疏證卷一

臨海洪頤煊撰

金城郡河關縣積石山在西南羌中河水行塞外東北入塞內至章武入海過郡十六行九千四百里山海經海內昆侖之虛在西北河水出東北隅以行其北西南又入渤海又出海外卽西而北入禹所導積石山郭璞曰河南出昆侖潛行地下至蔥嶺出于闐國復分流岐出合而東流注渤澤已復潛行南出于積石山而爲中國河也水經積石在隴西河關縣西南後漢書注積石山在今鄯州隴支縣南卽禹貢云導河積石是也案禹貢河自碣石入海溝洫志周譜云定王五年河徙武帝紀元光三年春河水徙從頓邱東南流入勃海此志所記之河道也水經敘河水自黎陽以下有河水故瀆而以漯水爲河水正流蓋元始以後所改變矣河自河關至章武所過有金城天水武威安定北地朔方五原雲中定襄雁門西河上郡河東左馮翊河內河南魏郡東郡清河平原信都勃海二十二郡今本作十六者字之誤也

金城郡白石縣離水出西塞外東至枹罕入河

水經注離水導源塞外羌中東北流又東逕白石縣故城南又東逕枹罕縣故城南又東北出峽北流注于河

隴西郡臨洮縣洮水出塞外羌中北至枹罕入河

說文解字洮水出隴西臨洮東北入河水經河水又東過隴西河關縣北洮水從東南來注之注沙州記曰洮水與墊江水俱出嶠臺山嶠臺西傾之異名也洮水東北流逕吐谷渾中又東逕臨洮縣故城北又北逕安故縣故城西又北逕降狄道故城西北入河括地志嶠臺山在洮州臨洮縣西南三百三十六里

謹案水經注降狄道戴校本據漢書刪降字

金城郡臨羌縣北則湟水所出東至允吾入河

說文解字湟水出金城臨羌塞外東入河水經注王莽更允吾爲修遠縣河水逕其南西有湟水出塞外東逕西王母石室石釜西海鹽池北故關駟曰其西卽湟水之源也東逕臨羌縣故城北又東逕安夷縣故城又東逕允街縣故城南又東逕枝陽縣又東流注于金城河卽積石之黃河也

金城郡浩亶縣浩亶水出西塞外東至允吾入湟水

水經注湟水又東南逕小晉興城北又南與闔門河合卽浩亶河也水出西塞外東入塞內逕敦煌酒泉張掖南又東逕浩亶縣故城南又東流注于湟水元和郡縣志湟水縣浩亶水今謂之闔門水經縣東去縣五十五里

謹案闔戴校本作闔

金城郡允吾縣烏亭逆水出參街谷東至枝陽入湟

水經注湟水又東逕枝陽縣逆水注之水出允吾縣之參街谷東南流又東逕枝陽縣故城南東南入

于湟水。元和郡縣志：廣武縣烏逆水，在縣西南二十許里。

金城郡，令居縣。湟水出西北塞外，至縣西南入鄭伯津。

水經注：湟水又東逕允吾縣北，爲鄭伯津，與湟水合。水出令居縣西北塞外，南流逕其縣故城西，又南流注鄭伯津。

安定郡，胸卷縣。河水別出爲河溝，東至富平北入河。

水經注：河水於此有上河之名也。又云：河水又東北逕廉縣故城東，河水又北與枝津合水，受大河。東北逕富平城，所在分裂，以溉田圃。北流入河，今無水。爾雅曰：漣反入，言河決復入者也。河之有漣，若漢之有潛也。

定襄郡，武進縣。白渠水出塞外，西至沙陵入河。

水經注：白渠水出塞外，西逕定襄武進縣故城北，又西南逕雲中縣故城南，又西北逕沙陵縣故城南，其水西注沙陵湖。

定襄郡，武泉縣。荒干水出塞外，西至沙陵入河。

水經注：荒干水出塞外，西南逕武泉縣，又南逕原陽縣故城西，又西南注沙陵湖。湖水西南入于河。上郡，白土縣。圓水出，西東入河。

史記匈奴列傳：作圓洛之間。晉灼曰：圓音囿。三倉作圖。顏師古曰：圓水，卽今銀州銀水是也。書本作圖。

後轉寫者誤爲圓耳。水經注：圖水出上郡白土縣圖谷，東逕圖陰縣南，東流注于河。

太原郡汾陽縣北山，汾水所出，西南至汾陰入河，過郡二，行千三百四十里。

山海經：管涔之山，汾水出焉，而西流注于河。淮南子：汾出燕京十三州，志曰：亦管涔之異名也。元和郡縣志：靜樂縣管涔山，在縣北一百三十里，汾水源出焉。水經：汾水出太原汾陽縣北管涔山，至汾陰縣北，西注于河。郭璞曰：今汾水出太原晉陽，故汾陽縣，東南經晉陽，西南經西河，平陽至河東汾陰入河，過太原、河東二郡。

太原郡晉陽縣龍山在西北，晉水所出，東入汾。

山海經：縣雍之山，晉水出焉，而東流注于汾水。水經：晉水出晉陽縣西縣甕山，又東過其縣南，又東入于汾水。魏書地形志：晉陽西南有縣甕山，一名龍山，晉水所出。元和郡縣志：在縣西南十二里。

隴西郡首陽縣禹貢鳥鼠同穴山在西南，渭水所出，東至船司空入河，過郡四，行千八百七十里。

山海經：鳥鼠同穴之山，渭水出焉，而東流注于河。又云：渭水出鳥鼠同穴山，東注河，入華陰北。水經：渭

水出隴西首陽縣渭谷亭南鳥鼠山，至華陰縣北，又東入于河。郭璞曰：鳥鼠同穴山，今在隴西首陽縣

渭水出其東，經南安、天水、略陽、扶風、始平、京兆、宏農、華陰縣入河。括地志：渭水源出渭原縣西七十六

里鳥鼠山，東流入河，過隴西、天水、右扶風、左馮翊四郡。

右扶風、汧縣，汧水出西北入渭。

說文解字。汧水出扶風汧縣。西北入渭。水經注。汧水出汧縣之蒲谷鄉弦中谷。決爲弦蒲藪。水有二源。一水出縣西山。東逕汧縣故城。北流注于汧。汧水又東會一水。發源南山西側。又東南逕隄縣故城南。東南逕郁夷縣。逕平陽故城南。又東流注于渭。括地志。汧水源出隴州汧源縣汧山。東入渭。

右扶風武功縣。斜水出衙領山。北至郿入渭。

水經。渭水又東過武功縣北。注斜水。出縣西南衙領山。北歷斜谷。逕五丈原東。水出武功縣。故亦謂之武功水。其水北流注于渭。

右扶風漆縣。漆水在縣西。

山海經。嶓次之山。漆水出焉。北流注于渭。郭璞曰。漆水出岐山。說文解字。漆水出右扶風杜陵岐山。東入渭。一曰入洛。水經。漆水出扶風杜陽縣俞山。東北入于渭。注。漆水出杜陽縣之漆谿。謂之漆渠。故徐廣曰。漆水出杜陽之岐山者是也。括地志。漆水源出岐州普潤縣東南岐漆山。漆谿東入渭。

右扶風杜陽縣。杜水南入渭。

水經注。杜水出杜陽山。謂之杜陽川。在會漆水東。逕杜陽縣故城東。又南流注于渭。

右扶風鄠縣。鄠水出東南。又有澗水。皆北過上林苑入渭。

水經。渭水過槐里縣南。又東。豐水從南來注之。張揖上林賦注。豐水出鄠南山豐谷。括地志。豐水源在雍州長安縣西南山豐谷。元和郡縣志。鄠縣。豐水出縣東南終南山。自發源北流。經縣東二十八里。北

流入渭。呂忱曰：潏水出杜陵縣。水經注：渭水又東北逕渭城南，而沔水注之。其水上承皇子陂于樊川。其水西北流，又北逕長安城西，又北流注渭，亦謂是水爲潏水也。

右扶風郿縣成國渠，首受渭，東北至上林，入蒙籠渠。

水經注：整屋縣北有蒙籠渠，上承渭水于郿縣東，逕武功縣東，爲成林渠。東逕縣北，亦曰靈輅渠。漳渠以引堵水，案成林渠卽成國渠之譌。元和郡縣志：郿縣成國渠在縣東北九里。水經注又云：渭水又東會成國故渠。渠魏尙書左僕射衛臻征蜀所開也。其瀆上承汧水於陳倉東，東逕郿，及武功槐里縣北，又東逕茂陵縣故城南，又東逕平陵縣故城，又東南注于渭，當由後人改鑿，非志之所云矣。

京兆尹南陵縣澹水

舊本誤作汧水

出藍田谷，北至霸陵，入霸水。霸水亦出藍田谷，北入渭。

說文解字：澹水出京兆藍田谷，入灊水。水經：澹水出京兆藍田谷，北入於灊，注澹水出南陵縣之藍田谷西北流，與一水合。水出西南莽谷，東北流，注澹水。澹水又北歷藍田川，北流注于灊水。水經：渭水又東過霸陵縣北，霸水從縣西北流，注之。注：古曰滋水。秦穆公霸世，更名滋水爲霸水，以顯霸功。水出藍田縣藍田谷，元和郡縣志：藍田縣霸水卽秦嶺水之下流，東南自商州上洛縣界流入，又西北合澹水，入渭。藍田山一名玉山，一名覆車山，在縣東二十八里。

安定郡涇陽縣，幵頭山在西，禹貢涇水所出，東南至陽陵入渭，過郡三，行千六十里。

說文解字：涇水出安定涇陽幵頭山，東南入渭。郭璞曰：今涇水出安定朝那縣西幵頭山，至京兆高陵

縣入渭水經注渭水東逕霸城縣北與高陵分水左則涇水注之括地志涇水源出原州百泉縣西南
斧頭山涇谷元和郡縣志百泉縣涇水源出縣西南涇谷過安定右扶風左馮翊三郡

右扶風汧縣芮水出西北東入涇

山海經龍首之山茗水出焉東南流注于涇水案茗當爲芮水經注芮水出小隴山元和郡縣志華亭
縣小隴山在縣西四十里

安定郡烏氏縣烏水出西北入涇

舊本作入河誤

續漢志烏枝補注本傳有龍池山地道記曰烏水出太平寰宇記烏水出都盧山有西烏水又東北逕
烏氏縣東注于涇

左馮翊襄德縣洛水東南入渭

周禮雍州其浸渭洛注洛出懷德賈公彥曰此洛卽詩云瞻彼洛矣一也與禹貢導洛自熊耳者別水
經渭水又東過華陰縣北注渭水東南洛水入焉闕駟以爲漆沮之水晉灼曰水經洛水出上郡雕陰
秦冒山過華陰入渭卽漆沮水也程大昌曰諸家言洛卽漆沮所謂洛水者地理志曰出北地歸德縣
戎夷中今案其自入塞後逕鄜坊同之三州乃始入渭孔安國輩謂自馮翊懷德縣入渭者是也

北地郡歸德縣洛水出北蠻夷中入河

山海經白於之山洛水出于其陽而東流注于渭淮南子洛出獵山高誘曰獵山在北地西北夷中說

文解字。洛水出左馮翊歸德。北夷界中。東南入渭。案志上記其委。此記其源。二洛本一水。故說文卽合爲一。與志同也。所云入河者。由渭以入河也。

北地郡直路縣沮水出。東西入洛。

說文解字。瀘水出北地直路。西東入洛。水經。瀘水出北地直路縣。東過馮翊殷祿縣北。東入於洛。注。今水自直路縣東南。又東逕粟邑縣故城北。其水又東北注於洛水也。

宏農郡宏農縣衡領

衡領舊本作衡山領

下谷。瀘水所出。北入河。

水經注。瀘水有二源。左水南出于衡嶺。世謂之石城山。其水東北流。逕石城西。東北合右水。右水出石城山東北。逕石城東。東北入左水。瀘水又北入門水。門水又北逕宏農縣故城東。而注于河。太平寰宇記。恆農縣衡山嶺。在縣西南三十五里。

宏農郡上雒縣禹貢。雒水出冢領山東北。至鞏入河。過郡二。行千七十里。

山海經。謹舉之山。洛水出焉。又云。洛水出洛西山。東北注河。入成臯之西。水經。洛水出京兆上洛縣謹舉山東北。過鞏縣。入于河。杜預曰。雒水出上雒縣冢領山東北。經宏農。至河南鞏縣入河。元和郡縣志。鞏縣洛水。東經洛汭。北對琅邪渚。入河。謂之洛口。過宏農。河南二郡。

宏農郡盧氏縣熊耳山在東。伊水出。東北入雒。過郡一行四百五十里。

山海經。蔓渠之山。伊水出焉。而東流注于洛。郭璞曰。今伊水出上洛盧氏縣熊耳山。東北至河南洛陽。

縣入洛。水經：伊水出南陽魯陽縣西蔓渠山，又東北至洛陽縣，南北入洛，過河南郡。河南郡穀成縣，禹貢瀍水出轆亭北，東南入雒。

續漢志：穀城縣瀍水出，補注博物記曰：出潛亭山。水經：瀍水出河南穀城縣北山，又東過洛陽縣南，又東過偃師縣，又東入于洛。注：穀城縣北有潛亭，瀍水出其北梓澤中。括地志：瀍水出洛州新安縣，東南流至洛州郭內，南入洛。

宏農郡新安縣，禹貢澗水在，東南入雒。

山海經：白石之山，澗水出於其陰，西北流注於穀水。說文解字：澗水出宏農新安，東南入洛。水經：澗水出新安縣南白石山，東南入于洛。注：世謂是山曰廣陽山，水曰赤岸水，亦曰石子澗。東北流歷函谷東坂東，卽周書所謂我卜澗水東，言是水者也。括地志：澗水源出洛州新安縣東白石山東北，與穀水合流，經洛州郭內，東流入洛。

宏農郡黽池縣，穀水出穀陽谷，東北至穀成入雒。

山海經：傅山之西有林焉，曰墦冢，穀水出焉，而東流注于洛。郭璞曰：今穀水出穀陽谷東北，至穀城縣入洛。河水經穀水出宏農黽池縣南墦冢林穀陽谷，東北過穀城縣北，又東過河南縣北，東南入于洛。注：今穀水出于嶠東馬頭山穀陽谷，東北流歷黽池川，亦謂之彭池，穀水出處也。上黨郡穀遠縣羊頭山，世靡谷沁水所出，東南至滎陽入河，過郡三，行九百七十里。

說文解字沁水出上黨羊頭山東南入河水經沁水出上黨涅縣謁戾山又東過武德縣南又東南至滎陽縣北東入于河注或言出穀遠縣羊頭山世靡谷元和郡縣志綿上縣羊頭山一名謁戾山在縣東北五十里沁水所出過上黨河內河南三郡

上黨郡泫氏縣楊谷絕水所出南至壘王入沁

水經注絕水出泫氏縣西北楊谷東南流逕泫氏縣故城北與泫水會東南入高都縣右入丹水太平寰宇記高平縣絕水在縣西北三十里源出礪礪山楊谷案水經注自此以下至入沁俱稱丹水太平御覽引志作泫水水經注泫水導源縣西北泫谷與絕水源別

上黨郡高都縣莞谷丹水所出東南入絕水

水經注丹水出上黨高都縣故城東北阜俗謂之源源水山海經曰沁水之東有林焉名曰丹林丹水出焉卽斯水矣丹水自源東北流又屈而東注左會絕水丹水又東南出山逕鄴城西又西逕苑鄉城北東南注于沁

河內郡共縣北山淇水所出至黎陽入河

山海經沮洳之山淇水出焉南流注于河說文解字淇水出共北山東入河一曰出隆慮西山水經淇水出河內隆慮縣西大號山高誘曰大號山在河南共縣北或曰在隆慮西水經注淇水歷舊淇水口東流逕黎陽縣界南入河溝洫志遮害亭西十八里至淇水口是也水經淇水又東過內黃縣南爲白

溝屈從縣東北與洹水合。又東北過館陶縣北。又東過清淵縣西。又東過廣宗縣東。爲清河。又東過武城縣西。又東過廣川縣東。又東過脩縣南。又東過東光縣西。又東北過南皮縣西。又東北過浮陽縣西。又東北過溧榆邑。入于海。案水經。淇水與黃澤、清河、洹、蕩諸水亂流通稱。志不謂之淇水也。

上黨郡壺關縣沾水。東至朝歌入淇。

說文解字。沾水出壺關。東入淇。水經注。沾水出壺關縣東沾臺下。泉流發于西北隅。又東流注于淇。元和郡縣志。壺關縣羊腸坂在縣東南一百六里。沾水出焉。

河內郡蕩陰縣蕩水。東至內黃澤西山。美水所出。亦至內黃入蕩。

說文解字。蕩水出蕩陰縣。東入黃澤。水經。蕩水出河內蕩陰縣西山東。又東北至內黃縣。入于黃澤。溝洫志。內黃界中有澤方數十里。水經注。美水出蕩陰西北韓大牛泉。又東流逕美城北。又東歷黃澤入蕩水。太平寰宇記。蕩陰縣蕩水在縣治北。源出縣西牟山。去縣三十五里。美水源出縣西北山下。元和郡縣志。內黃縣黃澤在縣西北五里。

魏郡內黃縣清河水出南。

續漢志。魏郡內黃縣清河水出水經。淇水東北過廣宗縣東。爲清河。案自此以下至入海。注皆謂之清河。

魏郡鄴縣故大河在東北入海。

續漢志魏郡鄴有故大河。水經河水又東北過黎陽縣南。河之故瀆出焉。注溝洫志曰河之爲中國害尤甚。故導河自積石歷龍門醜二渠以引河。一則漯川今所流也。一則北瀆王莽時空。故世俗名是瀆爲王莽河也。史記正義河至冀州分布爲九河。下至滄州更同合爲一大河。名曰逆河而夾右碣石入于勃海。案水經東漢人所撰。故以漯川爲河水正流。其北瀆王莽時空者。疑卽志至章武入海之道也。此故大河卽王橫所云禹之行河水本從西山下東北去者。

魏郡館陶縣河水別出爲屯氏河。東北至章武入海。過郡四行千五百里。

溝洫志自塞宣房後河復北決於館陶分爲屯氏河。東北經魏郡清河信都勃海入海。水經河之故瀆自沙邱堰南分屯氏河出焉。注一水分大河故瀆北出爲屯氏河。逕館陶縣東東北出。又云屯氏河故瀆自別河東逕甘陵之信鄉縣故城南。又東逕甘陵縣故城北。又東逕靈縣北。又東北逕鄒縣與鳴犢河故瀆合。上承大河故瀆于靈縣南。地理志曰河水自靈縣別出爲鳴犢河者也。案屯氏河自館陶別出至章武入海與大河同也。

清河郡靈縣河水別出爲鳴犢河。東北至菑入屯氏河。

溝洫志元帝永光五年河決清河靈鳴犢口而屯氏河絕。水經注大河故瀆又東北逕靈縣故城南。河水于縣別出爲鳴犢河。十三州志曰鳴犢河東北至菑入屯氏。

清河郡信成縣張甲河首受屯氏別河。東北至菑入漳水。